

1501 fulas oceani, atque ad innumeros continentis portus con-
 ventusque hominum profecti, sylvis felicibus odorum omni
 genere, ebore, argento, auro, gemmis beatos, se contu-
 lerunt: & Colocuite, oppido propter affluentem earum
 rerum, quas in primis quærebant atque adamabant, co-
 piam maxime omnium opportuno, præliis secundis fa-
 ctis, & munitionibus institutis in potestatem redacto, eas
 regiones tenuerunt: Taprobaneque insula multorum men-
 sium itinere post tergum relicta, quo nemo unquam penetra-
 vit, sui regis signa audacissime felicissimeque intulerunt.
 Tametsi majore omnino audacia, felicitate autem nunquam
 alias audita, si vixisset, Ernandus Maglajanes Lusitanus
 fuit, qui Hispaniæ regum opibus classe comparata, viæ
 initio in austrum se flectens, atque ultra mediam cæli
 conversionem propter continentis terræ oras dextrorsum
 velificans, magno spatio ad polum versus peracto, ut il-
 lum longius altiore, quam nobis noster sit, eo in iti-
 nere habuerit; & freti, quod nunc *Maglajanis* appellant,
 angustiis trecentorum millium passuum in longitudinem
 decursis; iterum ad medium cæli spatium se convertit:
 deinde ad auroræ populos atque insulas odoratarum arbo-
 rum plenas, quas Molucas appellant, medium comple-
 xus globi solidi spatium pervenit, ibique pugnans inter-
 iit. Postremo illius comitatus per Lusitanorum partis
 oceanum labore plurimo universi orbis terrarum naviga-
 tione triennio confecta, in Hispaniam rediit: cumque to-
 tius itineris enumeratis diebus rationem, quam in tabulis
 habebat, repetisset, uno sibi annos illos die longiores fa-
 ctos, de dierum nominibus domi audiens, reperit: qui
 omnino anni, si se is ad orientem, domo profectus, con-
 vertisset, ac contra solem usquequaque currens illud ipsum
 iter universum confecisset, uno breviores die redeunti sa-
 ne fuissent. semper enim tanto citius orienti soli occur-
 rens, quanto plus itineris post se circumvectus reliquisset,
 emenso demum totius terræ globo, die uno prius solem si-
 bi orientem, quam cum viæ se dederat, profecto habuisset.

Eodem fere tempore, quo legati Pascalici literæ ad Sé-
 natum

*Ernandus
 Maglaja-
 nes primus
 navigando
 totum cir-
 cuit terra-
 rum orbem.*